



FRanciscus ex Rœtilensi dominio iuxta Basileam in pago Lerach Anno circiter 1465 natus est. Is cum felici ingenio esset præditus, bonis literis operam Basileæ dedit, & in Academiæ gremiũ receptus, in artium studio adeo profecit, ut omnium cõsensu liberalium artium Magister crearetur. Cum hoc modo egregie profecisset, Basileæ ad S. Martium scholæ præfectus iuventutem instituit, & meliores autores explicauit. Postea uerò in Sueuiam progressus, monachorum ordini sese coniunxit, ut et studijs et religioni commodius incumberet. Cum autem paulo post per Lutherum in Saxonia, & Zuuinglium in Heluetia Euangelij doctrina promulgaretur, ipse eandem amplexus ordinem reliquit, & in Heluetiam redijt.

Erant tum præstantes aliquot uiri Bernæ, qui hunc Franciscum ob eruditionem & uitæ integritatem amarēt, atq; ad se Bernam pellicerent. Ibi cum esset, concionibus præficitur. Tum uerò publicè Euangelium docuit, atq; uarias pontificiorum superstitiones taxauit. cum autem alij resisterent, atq; hanc nouam doctrinã improbarent, Magistratus iussu Bernæ 1527 publica disputatio fuit indicta. In ea Franciscus præsedit, atq; sua eruditione reliquos confutauit. Itaq; eius potissimum instructu potens illa respublica religionem mutauit, atq; Euangelij doctrinam suscepit. Cum hoc modo uitia hominum redargueret, & saluatorem Christum ostenderet, anno ætatis 70, salutis uerò 1535 Bernæ obiit, & honestè sepultus fuit, Anon.